

# BOLSAS DE APOIO Á MELLORA EN COOPERATIVAS E ENTIDADES DE ECONOMÍA SOCIAL

Convocatoria 2019

Destinatarias: Persoas desempregadas


## Convoca

**Unión de Cooperativas Galegas EspazoCoop**, no marco do Programa de actuación 2019 da Rede Eusumo

A Rede Eusumo é unha rede de colaboración impulsada pola Secretaría Xeral de Emprego da Xunta de Galicia para o fomento e consolidación do cooperativismo e a economía social que conta co financiamento do Ministerio de Traballo, Emprego e Seguridade Social.

## Financian

Consellería de Economía, Emprego e Industria – Xunta de Galicia.  
Ministerio de Traballo, Emprego e Seguridade Social – Goberno de España.



## Obxecto

**EspazoCoop**, como entidade representativa do cooperativismo en Galicia e integrada por cooperativas con distintas actividades empresariais, ten como un dos seus obxectivos mellora xestión e funcionamento das cooperativas que asocia. Coñecida a situación existente, dun baixo nivel de xerencias profesionais nas cooperativas e entidades de economía social, márcase como obxectivo ofrecer un servizo de **apoio ao labor xerencial**, convocando para elo o programa de bolsas de apoio á mellora na xerencia en entidades de economía social.

O obxecto desta convocatoria é **seleccionar a un mínimo de 7 persoas bolseiras**, desempregadas, **tituladas e formadas na área empresarial**, para incorporarse nalgún das entidades beneficiarias seleccionadas, realizando prácticas, en réxime de xerencia individual, e un proxecto de apoio e mellora xerencial na entidade, **durante 4 meses** (a bolsa exige ter disponibilidad, porque require dunha adicación continua e presencial).

A finalidade prioritaria do programa é **mellorar as condicións nas que as entidades de economía social abordan a función xerencial**, e tamén **fomentar o emprego** mellorando a capacitación das persoas mediante un proceso de iniciación profesional nas entidades beneficiarias.

## CONDICIÓNS DAS BOLSAS

### Selección das persoas bolseiras

Realizarase un proceso de selección das persoas bolseiras, do que se encarga ESPAZO COOP, para seren asignadas a cada unha das entidades beneficiarias dunha bolsa, que terá dúas fases:

- 1) Pre-selección en función do curriculum e un formulario de datos.
- 2) Selección final das persoas bolseiras, unha vez realizado un curso de formación presencial de 20 horas sobre economía social no mes de marzo de 2019 en Santiago de Compostela. Cabe a posibilidade de que EspazoCoop poida realizar algunha entrevista ás candidatas, se o considera necesario para facilitar a selección definitiva.

## Períodos de inicio e finalización da bolsa

A estadía da persoa bolsreira na entidade beneficiaria comprenderá do 1 de abril ao 31 de xullo de 2019.

## Ubicación xeográfica das cooperativas e entidades de ES beneficiarias

- Redondela (Pontevedra)
- Ourense (Ourense)
- Ames (A Coruña)
- Santiago de Compostela (A Coruña)
- A Coruña (A Coruña)

A cada persoa bolsreira seleccionada seralle asignada unha cooperativa ou entidade de economía social en base á localidade á que se candidata.

## Programa formativo

As bolsas son un programa formativo (teórico e práctico), e as persoas bolsreiras seguirán un Plan de Traballo establecido, de xerencia dunha entidade de economía social, tendo como obxectivo final a elaboración dun proxecto de **Plan de Mellora** para a mesma.

A formación está adaptada ás particularidades do modelo empresarial da economía social, e basease en principios e valores propios, como a participación, a xestión democrática, a relación coa comunidade, a propiedade conxunta, a cooperación entre cooperativas, a autonomía, a axuda mutua, a responsabilidade compartida, a equidade ... O programa **incorpora as especialidades do Cooperativismo e a Economía Social**, sector que representa outras formas de relacións económicas, opostas a modelos baseados na obtención de beneficios soamente económicos.

O proceso de traballo será facer unha diagnose interna da entidade, facendo un percorrido polas diferentes áreas :

- Organizativa e legislativa
- Comercial e mercadotecnia
- Económico e financeira
- Planificación estratéxica
- Plan de mellora



E para elo contan cunha **titoría de EspazoCoop** que se encarga de realizar o seguimento e acompañamento dos traballos prácticos que fai na entidade como: acadar información relevante dos distintos ámbitos da entidade, analizar as diferentes áreas, aprender a interpretar a información, ordenar a información, propor, comunicar e guiar con eficacia para acadar obxectivos, planificar para lograr as metas, aplicar accións de mellora, realizar o seguimento das medidas tomadas na entidade, etc.

Tratarase de que as persoas bolsreiras adquiran unha visión estratéxica para aplicala na entidade; potenciar capacidades e habilidades claves para anticiparse ás consecuencias da xestión.

Non só se trataría de xestionar máis ou mellor, senón pensar estratéxicamente en novas accións que se terían que realizar ou cales deberían deixar de facerse.

Os traballos, en cada entidade beneficiaria dunha bolsa, terán un certo grao de adaptabilidade, en base ás súas necesidades e demandas específicas na área xerencial da entidade.

## Lugares nos que se desenvolve a bolsa

Como as persoas bolseiras seguirán un programa formativo teórico-práctico, dinamizado por unha persoa titora da Unión, o lugar de celebración dos traballos de apoio xerencial serán :

- Por un lado, nas instalacións da propia cooperativa ou entidade que se lle asigne.
- Por outro lado, nos lugares onde se desenvolvan as sesións de titoría ao longo da bolsa, nas que deben participar. (En instalacións de EspazoCoop, ou doutras entidades colaboradoras, nas localidades que se acorde en común, en función das diferentes orixes xeográficas da xente participante)

A meirande parte da bolsa desenvólvese nas instalacións da cooperativa ou entidade de ES.

## Duración e adicación semanal da bolsa na entidade

A **adicación semanal** da persoa bolseira será de **37,5 horas semanais**, e desenvolverase ao longo de **4 meses**.

## Axuda económica

Cada persoa bolseira recibirá una retribución bruta mensual de **960 €**, cantidade á que se lle descontará a Seguridade Social e a retención do IRPF correspondentes.

## Solicitantes e perfís

Persoas, desempregadas, menores de 35 anos, no último curso académico ou en posesión do título de grao, diplomatura ou licenciatura en titulacións relacionadas coa xestión empresarial (Administración e Dirección de Empresas, Económicas, Empresariais, Relacións Laborais, ...), tamén de Ciclos Superiores de formación profesional en especialidades relacionadas coa xestión empresarial.

Perfís en sintonía coa economía social, ou con sensibilidade, predisposición e inquietude por modelos empresariais con esa orientación.

Para a selección de bolseiros/as valorarase a traxectoria de estudos, coñecementos técnicos (análise económica e financeira, xestión fiscal, laboral ou contable, estratexia empresarial...), a formación e coñecementos en economía social, as experiencias laborais, experiencias de carácter asociativo ou comunitario, de voluntariado, etc.

Tamén serán valoradas as actitudes e aptitudes para desenvolver labores xerenciais - capacidades e habilidades neste senso-, como aspectos de iniciativa, resolución de conflitos, motivación, traballo en equipo e habilidades sociais, tamén os coñecementos de ferramentas e instrumentos de xestión, así como as que se poidan determinar coas entidades para cada proxecto concreto.

A selección final das persoas beneficiarias será validada por unha Comisión de EspazoCoop, atendendo aos criterios establecidos na convocatoria para entidades deste programa.

## Solicitudes e prazo

O prazo para inscribirse abrangue do **15 ao 26 de febreiro de 2019**. As persoas interesadas en candidatar como bolseiras deberán :

- 1) Cumprimentar o **formulario electrónico de datos neste enlace: [Formulario de inscrición](#)**
- 2) Enviar o seu **currículo** á Unión de Cooperativas EspazoCoop, ao correo electrónico: [roberto@espazo.coop](mailto:roberto@espazo.coop)

A inscrición **deberá indicar**, entre outros datos, a **localidade á que optan**.

- O que as candidatas indiquen no formulario de inscrición debe axustarse ao indicado no currículo enviado.
- O currículo avalará certas respostas do formulario, e debe cumprir os requisitos e condicións mencionadas nesta convocatoria, se non é así, a súa puntuación pode ser minorada ou inclusive pode excluírse a candidatura, ao non poder contrastar ou xustificar as respostas dadas no formulario e os requisitos da convocatoria.
- O currículum ten que poder acreditarse no momento que EspazoCoop o solicite.

### **Teléfono e mail de consulta e información:**

986 86 61 49 . De 9:00 a 14.00 horas, de luns a venres.

[roberto@espazo.coop](mailto:roberto@espazo.coop)

## Aceptación das bases

A presentación da solicitude implica a conformidade e aceptación das bases da convocatoria por parte da persoa solicitante.

As entidades convocantes resérvanse a posibilidade de modificar as datas, se fora o caso, por motivos e causas de interese para o desenvolvemento do proceso e o programa.